

3 Yohana

Yohana ya sɛmɛ taanri wo wemu ka ge

Jɔɔ mu we sɛmɛ we d'a tun wɛ?

N'a daa fɔɔ wa mu Yohana ya we sɛmɛ taanri wo we tun. Wee meɛ ki bye Gayusi.

We sɛmɛ we kakana juɔ

Yohana ya li she Gayusi na na wee ya Kile Kafila wu yere pyevɛɛ piimu torogo wu mu ge, na w'a pu conɪ xuuni. Na wu ganha bu daha Joterefu wo naha sheshɛɛɛ te feni wɛ. Wee Joterefu we bye egilizi nahagbaa fɔɔ, ga Yohana bi Kile Jozaama pu joveɛ piimu torogo wu mu ge, wu bi gbara w'a pee tirige wɛ.

A w'i wu fiin jo na waha sɛmɛ wu ni na kan Demecusi mu. Wee p'a wii na wee w'a pa ni sɛmɛ wu ni.

Sɛmɛ wu kafila jugbɔɔ

3 Yohana 1-4 Yohana fɔ mujuu.

3 Yohana 5-8 Gayusi wo paarigazaana le.

3 Yohana 9-12 Na Gayusi ganha bu daha Joterefu wo torogana li feni wɛ.

3 Yohana 13-15 Jomɔ pu taxɔɔ.

Yohana fɔ mujuu

1 ¹ Nɛ wemu wu jɛ egilizi nɔhɔle ge, nɛ wa we sɛmɛ we ka na tun na taanpii Gayusi mu, wee wemu kaa l'a dan nɛ ni can yɛ pyaa na ge.

² Na taanpii, nɛ Kile jɛɛri mu mu, kɔnhɔ ma keree di da naha taa tuun bɛɛri ni, m'a bye sicuumɔ na, ba Kile ya ma zɔ wu pye fɛɛfɛɛ wɛ. ³ Cebooloo n'a daa fɛɛ pii ya nɔ wɛɛ yiri naha. Ba can wu wa mu zɔ wu na wɛ, ni ba mu ya jaari na sahanɪ ni can wu ni wɛ, p'a yee paari wɛɛ mu. Yee ya taan nɛ ni xuuni. ⁴ Bani nɛ bu logo na nɛ nagoo p'a can wu koro jaari, yafiin ya dan nɛ ni na lee xɔ wɛ.

Gayusi wo paarigazaana le

⁵ Na taanpii, lemu bɛɛri m'a byi wù cebooloo n'a daa fɛɛ pu mu, ali na ta p'i jɛ bɛ nabuun ge, lee bɛɛri ya jɔ xuuni. M'a li pyi ni jɔmɛɛ fɛɛɛ ni Kile mu. ⁶ M'a pu co ni taanjɛɛge kemu ni ge, p'a pa kee kaa jo n'a daa fɛɛ pu mu naha. Ayiwa, jɔ mayɛ na, para lemu p'a giin di bye sanha ge,

m'a pu tɛgɛ na bɛ ni Kile jidaan ni. ⁷ Bani Yesu Kirisa wo labye wu wuu na p'a lee para li pyi. Wa bɛɛri wu jɛ wu ya dɔ Yesu Kirisa na-ɛ ge, pu wa wee wa shishiin bɛ kɛɛ yaaga feni wɛ. ⁸ Lee wuu na wɛɛ n'a daa fɛɛ ya yaa na pii sipyii pii shi tɛri. Wù ba lee pyi, l'a bye ma na giin wɛɛ bɛ p'a fara pu na pu labye wu funɔɔ ni, na can koo li shɛɛ sipyii pu na.

Jotɛɛfu mɛgɛ ya kyɛɛgi

⁹ Ayiwa, nɛ jɔɔpii kii ka sɛmɛ wɛnɛ la na na tun n'a daa fɛɛ pu mu wà. Ga we wu jɛ Jotɛɛfu ge, wu ya se wɛɛ kabeshɛɛ na wɛ, na giin wu wuyɛ pye n'a daa fɛɛ pu jahagbaa fɔɔ wa. ¹⁰ Lee wuu na nɛ ba nɔ wà, kaparaya yemu bɛɛri w'a byi ge, na joguumɔ pemu bɛɛri yu na waa wɛɛ na, na kafineye yemu bɛɛri tɛri wɛɛ na ge, n'a da yee bɛɛri jo yi nii na. Wu yɛɛ ya ta da kii yɛ na-ɛ dɛ, wu ya ta sɔɔ cebooloo n'a daa fɛɛ p'a diri wu mu wɛ. N'a daa fɔɔ wa bɛ bu jo wu pee tirige wuyɛ yíri, w'a jo tapyege wa lee bɛ na wɛ, na weefɔɔ kɔri yeege n'a daa fɛɛ pu pinnege ki ni.

¹¹ Ayiwa, na taanpii Gayusi, ma ganha bu da bye ye kakuuyo ye tuugo taannivɔɔ wɛ dɛ, ga ta kasaanɔaa taanni. Sipya wemu w'a saama pyi ge, wee wu jɛ Kile wo. Ga wemu bu gori yaha kakuuyo na na byi, lee ya li shɛɛ na weefɔɔ ya Kile cɛ wɛ.

Demecusi ya masɔɔɔ ta

¹² Ayiwa Demecusi kunni, n'a daa fɛɛ pu bɛɛri ya wee mɛsaanɔa yu. Can koo lemu bɛ w'a jaari ge, lee bɛ di wu mɛsaanɔa yu. Wee bɛ wa li fiin na can wu jɛ wii.

Jomɔ pu taxɔɔɔ

¹³ Ayiwa, jomɔ nɛɛhɛmɛ wa nɛ mu na yu ma mu, ga na funɔɔ wa di pee bɛɛri ka sɛmɛ we ni wɛ. ¹⁴ Nɛ giin jo l'a da mɔ wɛɛ di wùye ja, wù jo wùye nii na wɛ. ¹⁵ Kile wu naniɛ kan ma mu! Ma naniinɛɛ piimu pu wa naha ge, pee ya ma fò waa. Ma bɛ wu wù fò kan wù naniinɛɛ pu bɛɛri nigin nigin mu wà.